

四庫全書

集部

欽定四庫全書

集部

唐宋元名表卷下之三

詳校官中書_臣李采

侍讀_臣孫球覆勘

總校官編修_臣王燕緒

校對官編修_臣邱度澄

謄錄監生_臣談雋

欽定四庫全書

唐宋元名表卷下之二

明 胡松 撰

宋

生日謝禮物表 史真翁

具官臣某上表臣言伏蒙聖慈以臣年八十特遣使賜臣御筆溫言褒諭俾臣眉壽又賜臣金器香茶以光慶席臣已即時望闕謝恩祇受訖者一人盛治正欣仁壽

之同躋八袞衰踪亦荷康寧之敷錫敢期睿藻遠賚慶
儀奉內府之珍竒激中扃之感佩臣頓首頓首誠懼誠
抃伏念臣起身寒素遭世聖明依乘偶會於風雲遇合
適符於魚水力未施於橫草位遽底於面槐雖逼桑榆
獲遂掛冠之請而眷深簪履每興當宁之恩時蒙親札
之丁寧歲有生朝之賜予矧今厚意復示殊恩貂璫飛
鞚於川塗翰墨騰光於龍鳳謂臣浮生之稀有又過十
春祝臣暮齒之再延俾逢千歲杯盤羅列盆盎錯陳率

皆粟縷於魚金况乃環裝於百寶分上方之清馥掇正
焙之龍芽顧惟窮陋之居曷稱便蕃之寵茲蓋伏遇皇
帝陛下乾坤長養父母愛憐自執卷於潛藩暨秉鉞於
初政撫存特異終始弗渝稽古無功已媿於輜車乘馬
偷閒絕望載新於龍勺彝尊臣敢不銘刻肺腑精虔香
火誓殫微悃祈歸美於非常尚覲餘生觀大勲於萬一
臣感荷天恩不勝激切之至謹奉表稱謝以聞

狀元謝及第表

臣某言某月日誤蒙聖恩濫叨狀元及第者黃屋臨軒
肆頒清問丹墀唱第咸錫殊科茲為士子之榮益顯文
風之振臣某誠惶誠恐頓首頓首切以真人御極聖學
造微屈至尊而延四方之豪謀正道而發千載之祕畧
去細故招徠讜言方驚大對之難酬敢意殊恩之普及
伏念臣等久蒙樂育濫與觀光昧通經明道之方乏為
史綴文之識况禮樂之制作何足以知賴皇帝之憲章
乃所願學謹誦語言於紙上誤占英俊之選中俾釋布

韋悉加紳笏茲蓋伏遇皇帝陛下聖由天縱善與人同
明詔賓興豈漫修於故事昕庭親策冀有得於奇才上
勤旒宸之觀下采芻蕘之賤媿無剗切例辱甄收臣等
敢不思勵赤心愈堅素履淵源所自幸親見聖人之為
師夙夜靡怠誓必以忠義而相勉臣等無任

云云

侍講說書官為經筵進講孟子終篇謝賜金帶牙
簡同侍讀修史官謝賜御筵及鞍馬香茶進詩表
臣某等言伏蒙聖恩以經筵進講孟子終篇賜臣等金

帶牙簡并祕書省御筵及鞍馬香茶者華光講藝備觀
亞聖之書蓬省賜筵并錫多儀之寵感洪恩而播詠瞻
丹宸以颺言臣某等惶懼惶懼頓首頓首竊以漢帝論
經虎觀侈賜衣之渥唐宗嚮學瀛洲䟽給膳之榮意皆
寓於隆儒禮特豐於接下矧軻書之妙旨傳孔道之正
宗由義居仁七篇之言靡不載垂憲貽後百世之王莫
能違於穆熙朝若稽丕訓祖禹發明於元祐表臣敷繹
於紹興逮聖神尊德以有為於問學逢原而自得細旃

畫訪聆責難陳善之規我弁星環探知性盡心之蘊華
編甫徹謏聞異禪疇侍言講說之勞暨著記纂修之職
鏐鞏絢采復頌象齒之珍玉笋示慈咸綴麟臺之席上
駟式調於沃轡團龍交榮於奇芬稽古所無省躬莫稱
歸美以報拜手載朝贊至聖之大成述君臣之相說辭
陳約禮遠希積翠之篇句寫賜牋俯效集仙之飲退慙
斐墨曷對閑休茲蓋伏遇皇帝陛下居安資深守約施
博覽大賢之論集興盛治之雍熙德醉從容秩太清之

華燕幣將舄奕邁崇政之彞文臣等職媿寤疑恩沾同
樂讀古書而尚友諒懷望道之思頌清廟以致平期盡
事君之義臣等無任感天荷聖激切屏營之至謹各齋
沐撰成謝恩詩隨表上進以聞

知隆興府到任謝表

吳永叔

起廢寓里䟽榮侂藩臣罪積如丘山聖恩深於雨露恭
惟皇帝陛下法度堯禹典則舜文數引公卿欲聞四方
有水旱盜賊之奏親問守相要使庶民無歎息愁恨之

聲豈應一介臣之微輒冒二千石之寄伏念臣學迂而
僻志廣而踈居官無以踰人任郡率多廢事雖衆女望
娥眉而交嫉實小人負乘器以招尤特荷陛下知非臣
辜復以郡起式欽乃命爰疾其驅臣所領州

云

臣常

閱漢興圖數唐職貢或治南昌賜侯王之印或分西道
專採訪之權雖曰地雄亦因人重陳仲舉設孺子一榻
清譽高於岱嵩王弘仲得文正片碑靈光射於牛斗逮
我聖宋懿我孝宗升潛藩為統府之華表賜額用紀元

之號首振吏治以開中興今天子聖明朝廷寬大乃眷
玉龍之散吏就交銅虎之左符臣已於某月日到府上
訖謹宣鴻化式慰黔黎紫馬朱衣雖動千里湖山之色
玉珂金鑰尚思五更京闕之朝臣無任云

寧宗升遐慰皇帝表

趙履常

皇穹弗弔降此鞠凶黎民何辜罹此荼毒中慰伏以大
行皇帝撫億兆衆踰三十年仁恕結乎人心恭儉根於
天性清淨無作神明為徒故能消巨患若渙冰除宿奸

如棄唾宗社祇叶朝野宴寧陟方奄聞率土震動恭惟
陛下越自藩邸入承宗祧亭育之恩深付託之器重孝
思方切悲慕奚任然而綴衣於庭羣公既皆聽命即位
而哭百官莫敢不哀少抑至情永綏大業

寧宗升遐慰皇太后表

昊蒼降割宸極登遐羣方震驚萬衆號絕

中慰

恭惟太

皇太后陛下陰陽合德夙夜同心勵相歷年順成多慶
驟罹禍棘諒劇悲摧願裁弓劍之思勉副簾帷之託

皇太子薨慰寧宗表

皇支殞秀國嗣告凶地驚少海之翻天慘前星之掩矧
凡黔首能不悼心

中慰

恭惟陛下道冒羣倫仁懷庶類

哀元良之不淑惻慈念以何堪雖寢門常時遂缺三朝
之禮然宗廟重事當圖萬世之基願釋聖心以安寓內
謝復官表

真景元

瞽言觸憲宜坐錮於終身慶澤詠徽乃悉還於舊物幸
逾始望恩出更生臣感激感激頓首頓首伏念臣昔綴

周行嘗諍內直花萼晝日久承寧考之恩蒼梧暮雲忽
洒茂陵之血屬際飛龍之運首叨馳駟之招念非忘身
何以報國勉圖初政之助庶弗辱先皇之知而臣學泥
古陳識乖時變無素盍之慷慨有汲黯之慙愚聖君非
不受言自臣疎於開導國人皆稱有罪上獨示於矜容
弗貶潮陽之八千僅奪駢邑之三百出畫如孟子豈懷
悻悻之私在畝若劉生徒抱拳拳之意雖欲摩鉢而自
效終虞復玷於孔艱遽頒紫詔之新盡削丹書之舊秩

仍元士班視通臣閒館珍臺媿苟偷於廩祿鈞天廣樂
恍如侍於威顏人皆謂榮臣獨知懼此蓋伏遇皇帝陛
下聰明天縱聖敬日躋方東朝丕衍於修齡而南面躬
臨於曠典導民以孝既洽四海之歡與物為春忍視一
隅之泣釋羈魂於幽窅反逐客於囚山爰及顓蒙亦皆
牽復臣敢不淬磨宿志湔滌曩愆犬馬之養無他惟篤
愛君之義江湖之身雖遠敢忘在國之心臣無任
云

云

進大學衍義表

臣德秀言伏惟九月十五日中書省劄子為臣具奏乞
投進所撰大學衍義奉聖旨令疾速投進者伏以汙竹
雖勤何補聖經之奧食芹欲獻誤蒙天語之溫以十年
纂緝之餘欣一旦遭逢之幸臣德秀惶懼惶恐頓首頓
首惟大學設八條之教為人君立萬世之程首之以格
物致知示窮理乃正心之本推之以齊家治國見修己
為及物之原曾子之傳獨得其宗程朱以來大明厥旨
迨師儒之繼出有章句之昭垂且少所服膺晚而知趣

謂淵源遠矣實東魯教人之微言而綱目粲然乃南面
臨民之要道曩叨侍從論思之列適當姦諛蒙蔽之時
念將開廣於聰明惟有發揮於經術使吾君之心炳如
白日於天下之理洞若秋毫雖共兜雜進於堯朝豈魑
魅能逃於禹鼎不量菲薄欲効編摩遽罹三至之讒徒
結九重之戀既投閒而置散因極意以研精畎畝不忘
君每惓惓於報上藩牆皆置筆矻矻以窮年首剏聖
賢性命道德之言旁採古今治亂安危之迹必提其要

皆聚此書凡諸老先生之講明粗加該括於君子小人
之情狀尤極形容載瞻海嶽之崇深期効涓埃之裨補
茲蓋伏遇皇帝陛下乾旋坤運日就月將於緝熙單厥
心基命適隆於成后念終始典於學遜志克邁於高宗
方將切磋琢磨而篤於自修定靜安慮而進於能得事
欲明於本末理期貫於精粗適萃成編冒塵清燕止其
所止願益加止善之功新以又新更推作新民之化臣
千冒天威無任激切屏營之至臣所撰到大學衍義四

十三卷并目錄共成二十三帙用黃羅夾複封全謹隨表上進以聞

謝宣召入院表

伏以來從南服未宣民版之勞召寘北扉猥被宸綸之寵光生里巷榮動簪紳竊觀列聖之用人惟待詞臣而加禮蓋於言語文章之外責其論思獻納之忠或雖忤旨而暫閒終必弃瑕而復用修除翰苑在環滁出守之餘軾侍禁庭亦赤壁歸來之後豈非加歲月則其文老

涉憂患則其慮長乃登邃巖以備顧問如臣者才華弗
競慙拙自將掌先皇內制者六年每慙越俎迫陛下初
元之再命竟許循墻以馳驅州縣之頻且廢弃山林之
久見聞寢少藝業益荒結茅屋於雲邊已甘終老瞻玉
堂於天上若隔前生敢云白首之重來誤辱清衷之妙
簡獲玷久虛之選幾成三入之榮茲蓋伏遇皇帝陛下
肆筆成文解紉更化志孚羣聽欲下山東之書念在邊
陲或訪河西之事必有端良之彥以充供奉之班奚取

臣愚俾承人乏臣敢不益堅晚節思答隆知賜宮錦而嘉草詔之能雖非敢望錄金鏡而任進賢之要實所自期臣無任

進仙源類譜表

天發慶源衍皇支於有永國嚴大典章烈祖於無疆令日載蠲上儀交舉竊以建邦啟土胄本出於神明扶世導民德已參於化育厚裔苗之憑藉培厯運之靈長炎宗肇興上通元造昭陵在御專以至仁垂光覃被於雲

來流澤涵濡於億兆厥開真主並緝曠文譜增屬籍之
華牒冠史臣之錄發揮昌緒見小宗大宗之藩中載宏
綱示特書屢書之重源流綜貫典冊崇成繇宣祖以來
盛星羅於霄極若明道而後實日靖於洪圖振振信厚
之風皞皞泰和之治銀潢滉漾玉版闕嚴千八百國之
封先予異姓五三六君之籍允也同符懿鑠龐洪函生
闡懌恭惟皇帝陛下隆恩睦族駿惠紹基帝系綿延鑒
支葉本根之輔皇猷渾灝思規摹矩矱之尊式是不彛

對於華旦臣等參聯庭案親覲邦祺垂統聿傳陋柳芳
永泰之譜休聲遠繼賡石介慶厯之詩臣仰瞻天顏喜
躍屏營之至謹以仙源類譜隨表上進以聞

知泉州謝表

具官臣某言某月日蒙聖旨命臣知泉州者伏以蕩節
九州觀風何有桐城千里假寵過優倣見吏民敬宣詔
旨中謝伏念臣性資驕拙學術迂疎入侍禁林僅守勿
欺之節出乘使傳曾微可錄之勞每慙虛負於明恩敢

謂更叨於劇寄泉雖閩鎮古號樂郊其柰近歲以來浸
非昔日之觀征權太苛而蠻琛罕至滂傷相繼而農畝
寡收宗枝之廩倍增郡帑之儲赤立銀溢於山者亡有
歲為旁郡而代輸粟生於地者幾何日伺鄰邦之轉餉
慙慙乎鞭扑之苦眈眈焉帆檣之來凡茲數端尤為深
病顧雖一旦不可寧居竊自揣於庸虛凜莫知其稱塞
此蓋伏遇皇帝陛下燭臨萬國器使百工念臣篤於事
親期欲便甘旨之奉知臣嚴於律已或能銷貪鄙之風

進遽職以獎行錫溫綸而加勉敢不欽承異渥誓答隆
知廉平而吏民敬焉雖莫望漢人之政忠信則蠻貊行
矣願恪遵孔聖之言臣無任云

謝除禮部侍郎兼直院侍讀表

龍飛九五幸逢真主之興驛召再三俾造通臣之列職
親地遽恩鉅人微中謝臣竊惟國勢之重輕率視人材
之聚散王多吉士殆猶鳴鳳之集梧桐朝有直臣則若
猛獸之衛藜藿伏念臣學雖志道材匪踰人忝乙第於

慶元臨軒之初綴三館於嘉定改絃之始鼇扉久直曾
微華國之文螭陛屢前徒抱愛君之志越從予節游易
守藩尚期宣室之席前忽痛鼎湖之弓墮羲輪東出方
薄海之仰瞻漢札西來先時髦而取召身未登於詞掖
班已躡於儀曹金馬玉堂假儒臣之榮寵蘭臺石室窺
史氏之祕藏自惟何人叨此殊獎茲蓋伏遇皇帝陛下
德全純懿學務緝熙念皇天后土之照臨居懷兢畏察
君子小人之消長實兆興衰謂臣雖無適用之材知臣

粗有不欺之節擢躋通服許貢微忠臣敢不戒在苟容
期於美報惟禮可以為國願廣晏嬰之言非道不敢前
陳竊效孟軻之敬臣無任云

謝除戶部表

十連竊寵媿藩閭之罔功一札遄歸叨地官之進長班
躡陪於踐斗懼深重於履冰

中謝

伏念臣素守朴忠濫

膺廼簡曩被初元之召首躋通服之榮自退屏於山林
寢遯違於軒陛憂時之髮益白悵去國之十年戀闕之

心為丹敢忘君於一飯屬蒙起廢再玷承流皂蓋分符
甄復既還於舊物青冥授鉞繡行仍忝於故鄉曾坐席
之未溫忽賜環之已及方躬攬宏開於公道而彙征必
萃於羣賢敢圖孤踪之漂流亦辱清朝之記錄且民部
周司徒之任豈惟稽戶口於版圖顧尚書古納言之官
蓋實專喉舌之樞要誤拜演綸之渥冒陞戎履之華退
省驚疲曷勝螽負茲蓋恭遇皇帝陛下乾剛天健蓄懿
日新親庶政以厲精大明黜陟臨百官而昭德洞察忠

邪念臣嘗參紫橐之聯知臣粗厲素絲之節輒還近綴
俾侍清光臣敢不期稱隆私勉堅初志生財有道雖漸
源流本末之知事君勿欺願竭獻納論思之報

江東漕謝到任表

兩螭夾侍久點近班四牡載馳叨分劇部假中秘隆儒
之寵為外臺將指之光望過所期感深以惕臣某

中謝

伏念某材非適用幸有逢辰屬漢廷更化之初首唐室
登瀛之選金鑒夜直承密命者六朞玉陛晨趨對清光

於再稔凡吮墨濡毫之任皆振纓我弁其間吏責既稀
所願優游於邇列主恩未報寧忘眷戀於本朝其如親
聞喜懼之年當謹人子清溫之職輒援公輔辭翰林之
請庶幾潘岳奉版輿之權分太守之符日須成命出少
府之節遽冒殊恩懷章而過里門閱宿而臨封部敬卜
中和之節重宣寬大之書輅傳初馳旄倪爭覩謂朝廷
所以輟柱下之史蓋聖主所以惠江左之民因博采於
風謠頗究知其疾苦以垂罄之家而困追胥之目以屢

豐之歲而多流徙之人官無足證之簿書里有難平之徭役文移星火不勝胥吏之誅求牒訴丘山半為賦租之煩重興言及此勿掄可虐輒彈朝夕之咨諏兼體公私之緩急賦難遽省盍漸捐賦外之征民未易蘇當先去民間之蠹竊自量其繇薄恐終負於選掄茲蓋伏遇皇帝陛下洪造曲成大明博照念臣志存將母俾獲便於旨甘知臣學本愛人欲稍觀其政事肆加遽職仍畀重權臣敢不以阜俗為阜財之方以悅民為悅親之本

灌輸所仰媿初無鞭算之能擗節是先惟敬佩玉音之訓

再知泉州謝表

奉祠居里每勤北極之瞻進職守藩復忝南州之寄甫
臨舊服恪布寬條臣某中謝臣聞天道至仁風霆無竟
日之怒聖君大度山林鮮終棄之才韓安國起於徒中
柳宗元用於貶所皆為長吏蓋值明時微臣乏漢唐二
子之能陛下守祖宗萬年之法昨者金華之入侍溫然

玉色之下詢曷嘗因諫以罪人自愧格君之無術方桴
彈交上獨亮秋山之愚迨霑宵一頒盡洗元城之玷何
嗇於議罰而樂於用恩庸見九重之本心不忍一青而
弃物既班次對又秩殊庭沒齒飯蔬夫亦奚憾建牙作
屏則匪所期敢圖皂蓋朱轡之華仍涖紫帽清源之境
念昔先帝付臣此州玩愒三年不聞善最侵尋半世復
見遺民屬當公私凋敝之餘不勝上下煎熬之急七邑
而二為煨燼十室而九乏蓋藏禁旅雲屯軍餉每難於

宿飽宗藩日茂俸緡半出於鑿空自省迂踈若為經理
茲蓋伏遇皇帝陛下道心淵靜德性昭融不以諛悅為
愛君故畧臣疇昔嬰鱗之譴不以聚斂為體國故取臣
平時求牧之長畀以舊封責其來效臣昔猶將母今獨
携孥祿弗逮於養親志維遄於報上拊摩瘡痍冀邦人
生意之復還培溉本根為聖朝元氣之一助

代謝除工部侍郎表

秦少游

具官臣某言某月日誤蒙聖恩除臣為工部侍郎者入

司太僕已慚稱述之虛進貳冬官尤愧選掄之誤顧叨
塵之已甚念辭避之弗容承命惟驚撫躬以懼臣誠惶
誠恐頓首頓首伏念臣身承家訓世受國恩荷先朝特
達之知蒙二聖生成之賜左選都司之要既獲備員內
閣秘殿之嚴更容通籍以至外專兩郡內閱三卿徒為
歲月之淹莫克事功之效方虞罷黜退伏於田廬敢意
推遷遽陪於法從材微任過恩重報難此蓋伏遇皇帝
陛下盛德海涵至仁天覆以臣父某歷四朝而被遇登

三事以退居知父子至情欲慰桑榆之景念君臣難遇
遂收管蒯之才豈惟一敝族之榮時乃百執事之勸臣
敢不鞭策駑蹇淬厲鈍頑以捐軀報國之誠為竭力事
親之義臣無任云

謝除翰林學士表

汪彥章

非才冒寵久誇文石之班優詔傳恩趣上玉堂之直既
假朝章之煥仍分御府之珍遜避莫從叨塵為懼臣惶
媿惶媿頓首頓首伏以文章雖本一技命令實行四方

故自古禁林之除極當時儒者之選矧今多士尤重他
官內敷帝制之坦明外應軍書之警急學非閎博難酬
跋燭之咨思或淹遲將誤掣鈴之召當待瓌傑來承燕
閒如臣者猥以諸生起於遐裔首尾策名之二紀中間
不調者十年會真人光復之初陪列辟駿奔之後驟膺
簡拔徧歷高華既時巡清蹕之屢移方驛召羣英之未
至執羈在道視草無人姑從東省之聯魚候北門之對
嘗因多病不勝狗馬之心願賜寬恩任逐桑榆之暖卒

云代匱遂使為真茲蓋伏遇皇帝陛下志靖華夷憂深
宵旰勵精於學每求稽古之臣罪已以言欲致銷兵之
福治雖得要人豈當材臣敢不仰佩眷知力思補報絲
綸行遠顧奚俟於丹青海嶽居微或有資於塵露臣無
任云

辛亥年正旦遙拜道君皇帝表

伏以接千歲之統推神策以膺期上萬年之觴御端朝
而受祉若稽故實遙企清光恭惟太上皇帝陛下體道

粹精怡神冲漠方席宗祧之慶遽成國步之艱帝堯游
汾水之陽久忘天下文王遇明夷之卦益見聖人臣自
速威顏荐更時序當璣衡之載復悵旒宸之猶賒鴻鴈
雖賓莫致帛書於沙漠風濤中阻徒瞻雲氣於蓬萊

賀赤烏白鵲表

治格時雍祥昭羽屬生皆異稟凝丹素以成形出若相
符信圖書之上瑞必有召此來非偶然

中賀

伏以烏本

陽精鵲知歲事方聖祚紹隆於大德適天時應在於金

行宜爾珍禽呈茲瑞質孝能致哺煌煌儀則之新喜必
傳音翯翯羽毛之潔用明諸福之畢至孰謂二蟲之無
知恭惟皇帝陛下保合太和緝熙純嘏跂行喙息皆安
性命之情岳貢川珍盡發乾坤之蘊是生神物來相昌
期將合采以成章乃同時而薦祉徇翔有煒協周家王
屋之符粹美而真異莊子彫陵之見既九重之有託寧
三匝以求安臣等幸列近司喜逢休應有生咸遂宜多
可俯之巢同類相求將致來儀之鳳

羣臣上皇帝勸進第一表

天命有歸將嗣興於景運人心胥悅咸暱就於至仁雖
晬表之非遥猶鴻稱之未正辱居近列殊震危衷

中謝

伏念臣叨受國恩早居法從方百六朝廷之厄會偶二
三輔弼之無人猥以庸虛叅其謀議旋屬敵情之變遽
成天步之艱二帝出郊既蒙塵而不返九祧乏祀將攝
裸以為名所宜引死以力爭顧獨包羞而苟活生雖可
耻志則甚明蓋天下屯危方苦存仁之未定而古人事

業唯觀濟否之何如使生靈相顧以無歸雖溝瀆自經
而奚益輒慕周勃安劉之計庶伸程嬰存趙之忠儻奉
真人光膺神器嗣一祖八君之傳序慰四方萬里之謳
吟誓伏歐刀敢煩司敗幸率土相從而歸啓且諸侯不
輟以事周雖國鴻休實臣素志願假須臾之死前瞻咫
尺之威伏惟皇帝陛下中奮英明外符信順受圖高邑
之壘趣駕未央之宮盛九賓之禮以見羣臣輯六獻之
儀而朝清廟時方多故幸少留黃屋之心臣既無功願

自謹青宮之職

謝除兼侍講表

臣某言伏奉制命除臣兼侍講者視草禁嚴談經閒燕
叨近侍進言之責極儒臣稽古之榮拜命以還撫躬而
懼臣中謝嘗謂天縱將聖奚須博學以成名王求多聞
蓋欲取人而為善故自古右文之世必留心講藝之官
如臣至愚何以仰稱茲蓋伏遇皇帝陛下卓然上知濟
以克勤同漢祖之英論道不忘於息馬笈齊侯之陋讀

書見議於斲輪而臣猥以非才膺茲遴選第竭簡編之
習仰承帷幄之光雖海岳深崇顧何取涓埃之細然聖
賢聞見或不如農馬之專

謝進書特授左中大夫表

臣某言伏奉誥命以臣再修到元符庚辰所編詔旨等
特授臣左中大夫者國史補亡雖日勤於采獲君恩馭
幸乃歲冒於遷除矧方抱於遺弓忍獨榮於載筆上還
不獲退省為憂

中謝

恭以太上皇帝聖學高明天資仁

厚承熙洽百年之後享安榮兩紀之餘凡今言動之所
傳視古詩書而無愧祇緣誤國之相繼循致陟方而不
還既海隅皆服於堯喪宜柱下一新於漢注風蒙垂付
適幸纂成豈謂皇帝陛下明發有懷兼收罔棄嗟夏時
之既失於杞莫稽幸商頌之復全以那為首特懋存書
之賞猥霑承學之臣敢不仰奉殊私俯殫繇力裒中朝
副墨之要俟良史殺青之求穆王御駿以來歸已辜此
望孔子感麟而有作尚見其人

謝授新安郡侯表

臣某言准告命伏蒙聖恩以宗祀赦文授臣新安郡開國侯加食邑三百戶者禮洽中天慶軍外服猥奉十行之詔就加五等之封臣

中謝

伏念臣積冒恩私浸踰分

願作偷閒於異縣蒙起廢於偏城久客還家方憇南飛之鵲通侯授印忽成左顧之龜雖滲漉以惟均何遭逢之獨異茲蓋伏遇皇帝陛下陶鎔萬類藩飾羣工屬宣宗之受釐罄寰區而蒙福臣適臨本郡仍昨鄉州宋人

泮泮以得封望胡及此漢將銀黃而誇里榮乃過之寵
既逮於子孫忠敢移於生死臣無任 云
云

謝泉州到任表

恭承休命就易名藩去父母之邦接浙敢同於他國問
蠻夷之俗褰帷如在於中州責重捫心恩深隕涕 中謝
伏念臣昨從祠館叨領守符素號迂疎無問馬及羊之
智乃蒙安便得維桑與梓之州二年而勞力勞心一身
而畏首畏尾力祈罷免反冒遷除雖賣劔買牛老猶堪

於渤海然舉頭見日身益遠於長安茲蓋伏遇皇帝陛下
總覈百王照臨萬國眷方隅之瀕海須師帥之得人
故遣近臣往綏遐俗况今閩徼莫盛泉山既旁接書文
之同當尤懲獄市之擾臣敢不仰遵寬大俯厲衰殘講
求百粵之宜叅諸禹貢奉上三年之計對以春秋

皇太后還闕賀表

伏審太皇后旋輿朔漠正位東朝唯一人修不已之誠
故四海睹非常之慶恭惟皇帝陛下德配高厚孝通神

明躬行曾閱於九重力奉姜任於萬里雖天人之交相
實古今之未聞十載中天瞻鬱鬱葱葱之氣一朝廣內
賦融融洩洩之詩於昭夢日之祥永享含飴之樂臣屬
嬰官守阻造闕庭方歎唐朝屢下建中之詔忽聞漢殿
一新長樂之儀遙知坤極之尊莫望天顏之喜

謝謫永州居住表

屏愚冒寵久依日月之光盈滿延裁自處雷霆之下蒙
聖恩之寬大與善地以生全罪大心寒威深涕落中謝

伏念臣初無稱道積有悔尤所當退養於罷癘乃復浸
成於老諄忽聞威命適在窮途冒風雪以疾馳越江湖
而跼伏非恃冕旒之察難逃鈇鉞之誅茲蓋伏遇皇帝
陛下剛健法天聰明稽古干戈不用再臻全盛之時刑
賞何心一付至公之論而臣靡思兢慎仰負函容餅居
井涓雖有措身之地狐正丘首未知歸骨之期

賀皇太子正位表

伏審顯膺寶冊升位春宮臨軒行曠古之儀見廟示承

桃之重恭惟皇太子殿下分輝寶緒毓粹璿源挺天人
岐嶷之資稟神聖狗齊之教當周室本支之盛獨冠百
男宜漢家羽翼之成無煩四皓前星外炳洊震中潛某
幸列宗枝喜隆邦本河潤九里方率族以依仁月有重
輪願登歌而薦祉

謝除樞密使表

臣某伏蒙聖慈授以樞密之職牢辭弗獲者執柄於中
久污樞密之地進班其首更叨綸綍之恩蒙眷獎之非

常私瑣材而不已安危所係榮懼交深臣惶恐惶恐頓
首頓首伏念臣生江湖之鄉非廊廟之器偶扞防於牧
圉蒙記錄於冕旒當中興無文武之才有慙吉甫乃一
見受腹心之寄自比留侯荐膺推擇之榮遂處弼諧之
任謀參帷幄職摠韜鈴永言國步之屯方賴廟謀之勝
外有交侵之強敵內多竊發之姦民兩河未復於輿圖
二聖尚勞於岳狩非兵莫濟得士斯昌豈伊章句之腐
儒堪此朝廷之大任茲蓋伏遇皇帝陛下治先稽古志

在宅中躬堯舜之仁雖欲躋民於富壽據高文之憤不忘克已於憂勤詳延左右之臣猥及中下之品臣敢不兼收羣策務究遠猷念國家嘗膽之憂適當今日豈臣子捐軀之報或後古人臣無任云

代辭節度使表

誤恩隆洽久蒙曠職之譏小已兢慚敢緩辭榮之請具輸愚懇仰冒隆威中謝伏念臣早濫褒揚浸階華近雖孤忠圖報誓糜殞以為期然晚節知非悟滿盈之可戒昨

待言於帷幄祈休迹於田廬甫解煩機遽頒異數以章
句小儒而切授方之寵以斗升素志而叨制祿之優方
渙號之已行固牢辭而莫獲坐貪名器荐歷歲時若猶
冒昧以自如將至顛隤而靡悔伏望皇帝陛下特垂公
聽俯諒忱辭鑄築壇節制之名守弼亮允釐之任豈獨
少安於分願固將無累於恩私既聖度曲全諒保益謙
之終吉况天威未遠敢忘歸美之餘忠

代汪樞密辭免表

入參廟算方俟黜幽進長樞庭更叨圖舊仰荷褒揚之
過實深盈滿之憂敢布腹心仰干旒扆

中謝

臣竊以聖

主之用人也必量其材之所至忠臣之事主也先度其
力之所堪故為之上者靡傷知人之明為之下者得逃
曠職之累一失此道兩乖厥宜如臣者初乏經綸特緣
遭遇二紀服周行之末一朝居多士之先昨叨近弼之
除已過平生之望豈有方更於晦朔居然躡次於鈞衡
雖至無知敢忘自揆伏望皇帝陛下以隆寬盡物以獨

斷馭臣知愚誠蓋出於由衷於成命何嫌於反汗別求
賢佐共圖宏濟之功無使孤蹤益重疾顛之禍

代汪副樞辭免表

聖神有作方收海內之人豪綿薄何功遽執朝廷之兵
柄顧超踰之已甚雖庸懵以知辭

中謝

竊惟樞筦之司

實次鈞衡之任唯時初載順信獲助於天人宜帝遠圖
安危注意於將相倘以小人而大受孰宣元老之壯猷
如某者生本寒鄉出陪多士早從外補甘心簿領之勞

沒齒周行敢意功名之會昨屬裔夷之謀夏猥承明詔
以臨州內撫三軍本無奇策外乘一障僅守故封會帥
幕之肇開總兵符而入侍扞防牧圉跋履山川逮九五
御圖之初預三千同德之列負羈紲而巡天下自知罪
戾之多聽鼓輦而思將臣敢幸搜揚之及既委腹心之
寄仍加體貌之優非不願榮懼終速謗伏望皇帝陛下
特垂淵聽俯諒危衷收渙汗之誤恩責捐軀之後效義
非所處雖匹夫不可以利回情有可矜在明主固容於

理奪

建寧軍節度使謝表

呂吉甫

備嚴近之選而抵非常之愆當清明之朝而罹甚重之譴孽乃自作咎將誰歸伏念臣起自諸生暗於大道持竅啟之聞而欲經於事變信呻吟之得而希掛於功名分既過逾理宜顛越矧先帝有為之始乃羣材願効之時輒先要津以闕疑路雖預討論者三四事而參幾務者一二年凡是蠹國害民之由實臣懵學誤朝之致豈

亦下流之所處更令衆惡以皆歸偶失當時士師之刑
難逃今日司直之論尚蒙善貸未寘嚴誅特從四裔之
遷以正三凶之化衰疲遠謫人皆知其難堪親愛生離
聞者為之太息伏惟皇帝陛下天仁自得聖孝先充撫
弓劍之遺藏每加悽愴顧廟堂之舊物寧不盡傷特非
毀之至深猶典刑之為屈龍鱗鳳翼已絕望於攀援蟲
臂鼠肝一冥心於造化涕逐言出莫知所從

浙東提舉到任謝表

朱文公

擢於偏壘付以外臺便道造廟單車詣部延見父老問
其疾苦之由宣布詔書諭以丁寧之意榮逾望表懼溢
情涯中謝伏念臣生長田間棲遲林壑居然朴拙見謂
迂踈潛心切慕於師承行已敢干於義命會逢聖旦參
預時流驟自草萊起分符竹乾坤大德施且不貲螻蟻
私情報於何有屬歛歲民無艱食謂愚臣職有微勞寵
之冊府之華畀以近畿之節雖駑馬之十駕後者鞭之
然鼯鼠之五窮技止此耳毋乃累公朝之選重以為多

士之羞茲蓋伏遇皇帝陛下闢舜四門馭周八柄欲尺寸之長並用致孱弱之末亦收比奉對揚親叨臨遣大明委照不棄負薪之言零露䟽恩更下賜緡之令顧憂所在稱塞為難臣惟當恪意講求因時施舍不能則止戒小人之貪榮當官而行慕古人之報國庶殫毫末上答丘山臣無任

云云

南康軍到任謝表

迂愚無用久陪香火之班臨照不遺驟假兵民之寄懇

辭弗獲宣布云初感激涕零媿深汗浹中謝伏念臣受
材凡近賦性顓蒙徒能讀古人之書夫豈識當世之務
頃蒙登進獲奉清閒繼遠迹於丘樊遂閱歲華之久顧
馳心於魏闕敢忘葵藿之誠中兩奉於除書亦屢祇於
名節銜哀抱病既莫效於驅馳假寵䟽榮反謬膺於眷
獎方誓堅於素守庶少荅於殊知豈意因仍復階任使
論資校考既已極於超踰揣分量能懼愈難於稱塞矧
自垂於夙志又仰負於前恩雖嘗控瀝而莫回終坐懦

庸之無守遂扶衰朽暫別故山已見吏民具宣德意豈
曰昨非而今是實繇義重而身輕此蓋伏遇皇帝陛下
性得堯仁道高舜哲念安民之不易故慮尤軫於遠方
謂知人為甚難故用或收於棄物致茲孱瑣亦備使令
臣敢不仰奉詔條俯詢民瘼倘粗聞於疾疢詎辭撫字
之勞冀少假於旬時卒上退藏之請尚全末路克對寵

光臣無任

云

潭州到任謝表

衰病卧家不堪驅使誤恩分閭重玷選掄雖屢控於懇
辭顧曲勤於褒諭寵榮實異感懼難勝亟扶曳以就途
已支持而視事中謝伏念臣迂踈末學灾患餘生得陪

香火之班豈復冠紳之念海瀕牧養尚媿強顏嶺表蕃
宣幸蒙反汗豈期巨屏游拜明綸昔獨避禮樂之華今
專展詩書之試况學兼嶽麓修明遠自於前賢而壞帶
洞庭鎮拊近煩於元老俾承二任孰稱萬分豈惟冒辭
遠就近之嫌抑恐為知人安民之累雖欲量能而易地

欽定四庫全書

唐宋元名表
卷下之二

自知無力以回天勉見吏民具宣威德茲蓋伏遇皇帝
陛下文明出治仁孝保邦四方無虞尤軫一夫之不獲
九德咸事尚憂片善之或遺謂臣有討古之勤以臣懷
澤物之志假之師帥之職責以治教之功臣敢不仰佩
訓辭俯殫學力雖馳驅靡及唯知趨事之誠或黽勉不
前願遂歸田之請臣無任云

致仕謝表

臣熹言四月二十三日準尚書省遞到勅牒一道伏奉

聖旨宜守本官致仕臣已於當日望闕謝恩訖者投閒
置散方疑宿負之未償引戶校年忽慶湛恩之純被適
符忱請遂沐殊私揖杖知榮戀軒增慨

中謝

伏念臣聖

朝賤士幽谷鄙生自審凡才每抱遺經而永嘆人嗤僻
學雖逢盛世以何施乃誤選掄過叨任使然計出蕃而
入侍善無毫髮之稱獨聞倡偽以黨姦罪有丘山之積
果煩清議卒抵大呵幸夙簡於皇明得下從於輕典迹
已安於甿里祿猶寄於朝班出入三年未能寡過周旋

再赦亦既蒙恩迄臻告老之期亟決歸田之計尚意拘縻於謫籍豈容遂休佚之懷暨聞播告於臺評方喜有允俞之望本原所自會幸何多此蓋伏遇皇帝陛下神聖自天文明周物當彼忠佞交拏之際既皆判別而不疑逮其精華欲竭之時一與休息而無間智仁兼盡威德並流豈但一夫獨為私幸臣敢不仰陶至化俯遂餘年廣廈細旃雖已絕雲天之望東阡西陌尚難忘畎畝之忠生復何為死而後已一云仰潛至教益屬初心懍

歲月之無多雖已不堪於把玩悵淵冰之未免獨何敢
怠於戰兢誓畢餘生仰酬大化

落秘閣修撰依前官謝表

臣熹言臣昨於慶元三年正月二十七日準尚書省劄
子節文臣寮奏臣罪惡乞與褫職罷祠奉聖旨依劄臣
照會臣即於當日望闕謝恩解罷職名仍奉表稱謝去
訖今於月日復准都進奏院逋到月日告命一道付臣
落秘閣修撰依前官者彈文上徹已幸免於嚴誅詔墨

下頌復寵加於明訓閱時既久祇命更新感極涕零懼

深首隕

中謝

伏念臣草茅賤士章句腐儒惟知偽學之

傳豈適明時之用頃叨任使已屢奏於罔功旋即便安
復未能於寡過致煩重劾盡出宿愆謂其習魔外之妖
言履市廛之汙行有母而嘗小人之食可驗愚衰為臣
而高不事之心足明禮闕以致私故人之財而納其尼
女規學官之地而改為僧坊諒皆考實以非誣政使竄
投而奚憾不虞恩貸乃誤保全第令少避於清班尚許

仍居於散秩當璽書之來下恍歲律之還周視要因詎
止於旬時蓋存遷就逮數惡難從於末減猶聽省循口
誦以還心銘敢墜此蓋伏遇皇帝陛下仁兼覆載明極
照臨作福作威總大權而在己曰賢曰佞付公論於得
人謂罰刑固足以懲姦而播告豈容於匿指式敷顯號
徧警具寮臣敢不深省昨非細尋今是年齡晚晚雖悲
後效之無期肝胆輪囷尚喜孤忠之有在誓堅死守覲
荅生成

落職罷宮祠謝表

臣熹言臣前任秘閣修撰提舉南京鴻慶宮某年五月十三日已該滿罷至二十七日伏准尚書省慶元二年十二月劄子節文臣寮論臣罪惡乞賜睿斷褫職罷祠奉聖旨依臣已於當日謝恩祇受訖者罪多擢髮分甘兩觀之誅量極包荒姑示片言之貶逮復尋於白簡始知麗於丹書鑄延閣論譔之名輟真祠香火之奉茲為輕典允賴洪私捧戴奚勝感藏曷喻

中謝
伏念臣草茅

賤品江海孤生蚤值明時已誤三朝之眷獎晚逢興運
復叨上聖之深知召自藩維擢參帷幄畧無可紀足稱
所蒙暨遠去於朝行即永歸於農畝然猶賦之佚祿使
庇身於工祝之間寔在清流容厠迹於圖書之府所宜
恭恪或追悔尤乃弗謹於彛章致自投於寬網果煩臺
劾盡發陰私上瀆宸嚴交駭聞聽凡厥大譴大訶之目
已皆不忠不孝之科至於衆惡之交歸亦乃羣情之共
棄而臣憤眊初罔聞知及此省循甫深疑懼豈謂乾坤

之造獨回日月之光畧首從之常規既俾但書於薄罰
稽青終之明訓儻許卒遂其餘生是宜衰涕之易零已
覺大恩之難報此蓋伏遇皇帝陛下堯仁廣覆舜哲周
知謂表正於萬邦已極忠邪之判則曲全於一物未傷
黜陟之公遂使冥頑獲逃竄殛臣敢不涵濡聖澤刻厲
愚衷雖補過以修身無及桑榆之暮景然在家而憂國
未忘葵藿之初心瞻望闕庭臣無任 云

辭免待制仍舊充秘閣修撰提舉南京鴻慶宮謝

表

臣熹言伏蒙聖恩以臣累奏辭免煥章閣待制特降睿
旨依臣所乞仍舊充秘閣修撰提舉南京鴻慶宮者假
寵過優居速冒榮之愧封章屢卻退深留令之虞敢謂
天慈訖從人欲恩深莫報感極何言

中謝

伏念臣早以

迂儒濫塵官簿晚逢興運誤簡淵衷首頒召節之光華
促侍經帷之清燕趨箱待對復過借於寵光挾策陳詞
竟何裨於帝學旋奉閣勞之詔適諧退處之私雖竊便

安甫深依戀第顧山林之遠迹難通禁闥之近班亟冒
威顏荐輸卑悃幸所陳之大義已孚於未拜之前故引
避之微誠得遂於終辭之後然匪聖神之洞照敢期耆
陋之曲全而况內閣簡編未替兩朝之深眷舊邦香火
有嚴四聖之真游足安垂盡之期允謂非常之遇此盖
伏遇皇帝陛下仁涵萬有德奉三無謂臣於勸講之功
雖無所就察臣所懇辭之意悉出於誠特畀俞音使償
本願臣敢不益堅素守仰稱鴻施景雖迫於桑榆力難

報國身未填於溝壑詎敢忘君臣無任云

謝除待制侍講修撰實錄表

臣熹言伏奉告命授臣煥章閣待制侍講又准勅差兼實錄院同修撰者分閫南州愧蔑一毫之補論經內閣恍驚二命之頒畀史職以仍無戴上身而愈重藏逃莫避跼蹐靡容中謝竊以王求多聞是惟建事帝入西學于以上賢當始初清明之朝資朝夕論思之助作於心而闢政事必求其原修其身以及國家要知所本非精

誠之有恪何論說之足云視孟軻之敬王始不負聖人之學為張禹之持祿殆將貽天下之憂况薦紳之所難又載筆之為重顧頭白汗青之可誚豈槁項黃馘之能為念昔先臣嘗掌茲事正熙寧元豐之殽舛嚴於朱墨之分辨元祐紹聖之譏誣炳若丹青之著苟無家業曷踐世官情而居之吁可危矣伏念臣見聞甚狹才識非長開七袞之殘年荷三朝之異眷頃叨崇正之選嘗獲遂於終辭茲玷通英之聯覲莫從於素守此蓋伏遇皇

帝陛下言稽往訓動法成謨以緝熙光明之美而佛時
仔肩以剛健篤實之資而日新其德念遺大投艱之托
推好善忘勢之勤借是孤蹤聿求多士講魯論一簞之
義敢竊企於師傳誦楚史八索之文庶無忘於規益臣
無任云

除秘閣修撰謝表

朝散郎新授秘閣修撰主管南京鴻慶宮臣朱熹上表
言准告授前件職事臣再具辭免奉聖旨論撰之職以

寵名儒依降指揮不許辭免臣已於八月二十三日望闕謝恩祇受訖者愚誠屢黷初必冀於矜從成命莫回反重勤於褒借叨踰已甚俯僂何容

中謝

伏念臣賦質

甚迂遭時獨異頃罷外臺之使游陞內閣之華至於論撰之除尤荷聖神之眷顧無名而有愧遂澀惓以祈哀本謂壽皇知遇之深當卒全其素守敢意睿主清明之始即洞鑒其丹衷逮茲因事以求閒重以牧民之無狀乃逌黜幽之典復加申命之恩危惓再殫俞音終闕更

論崇儒之意俾知假寵之由仰隆指之若斯豈固辭之
敢必措躬無所引分弗違此蓋伏遇皇帝陛下盛德日
新至仁天覆欲風厲於四方之士誤用獎於一介之臣
臣敢不祇服訓詞恪思職業對揚休命惟慚薄技之無
堪敷暢遺經尚冀方來之有補以茲塵瀆少荅生成瞻
望闕庭臣無任

云云

漳州到任謝表

朝散郎直寶文閣權發遣漳州軍州事朱熹上表臣熹

欽定四庫全書

唐宋元名表
卷下之二

四

言准勅差前件差遣已於四月二十四日到任訖抱病
支離莫副光華之遣封章懇切更叨選用之良引避弗
回兢惶失次即強扶於枯朽已親見於耄倪仰戴恩威
俯深感懼伏念臣蚤由場屋獲廁縉紳惟自信其迂愚
故絕希於榮進中荷壽皇之深眷屢嘗收用而終許退
藏晚逢嗣聖之誤知亦既閔勞而復加任使凡此兩朝
之殊遇豈伊一介之能堪矧漳浦之名邦實甌閩之絕
徼青衫捧檄昔嘗粗習其土風白首分符今庶少安於

眚俗靜揣不才之分極知為幸之多此蓋伏遇皇帝陛下近法舜功遠循堯道九德咸事尚憂片善之或遺四方無虞猶軫一夫之不獲肆曲收於棄物俾加惠於遠黎臣敢不深體皇仁廣詢民瘼筋骸可勉豈忘盡瘁之勤疾疾或加未免告歸之瀆尚繫覆燾卒遂生成臣無

任云

謝依所乞仍舊直寶文閣及賜詔書獎諭表

臣熹言臣昨具狀辭免新除祕閣修撰恩命近准尚書

欽定四庫全書

唐書元表
卷下之二

省劄子奉聖旨依所乞仍舊直寶文閣仍賜臣詔書一道特加獎諭者白記上聞幸曲全於愚守璽封下逮庸特示於異恩祇服以還戰兢無已 中謝 伏念臣學雖違俗意敢近名徒以迂踈蚤絕榮途之望乃遭神聖晚深國士之知中少效於驅馳竟靡聞於報稱及奉金華之召寧忘丹宸之忠顧惟塵腐之淺聞莫副緝熙之隆指逮復退閒之秩乃降論譔之華寵雖荷於殊常義終慚於非據故上聖方臨於宸極而微臣屢觸於天威自度

孤危豈勝糜滅敢意出綸之渥有嘉陳義之名幸引分之少安愧叨榮之愈甚茲盖伏遇皇帝陛下重明必照大度并容謂臣粗業詩書諒亦有聞於古義憐臣稍知廉耻欲其無負於初心特屈憲章過形褒勸臣敢不服膺至教邁迹前修不忝不求何止終身之誦是曩是訓庶幾有極之歸臣無任

云云

代宰臣以下賀太上皇太上皇后尊號禮成表

堯仁舜孝際授受之昌期地察天明極形容於大冊四

方來賀萬福攸同

中賀

竊稽上聖傳序之符實貫千載

休嘉之運纂圖儲禁日重光而月重輪養志宸闈乾稱
父而坤稱母大矣承顏之慶溫然歸美之誠雖蕩蕩無
能名豈容擬議而業業致其孝當盡顯揚頒中禁之綵
綸集曲臺之弁冕金聲玉振繼以淵衷璧合珠連煥為
麗藻赫奕禮文之備昭華容物之陳歷吉日而協靈辰
肅將緝典蜚英聲而騰茂實並受鴻名有識有知以呼
以舞攬明皇之至道如彼其卑考順宗之應乾莫能相

尚有開盛典盡掩前聞恭惟尊號繼御丕圖奉承慈極
於帝其訓輯三統之睿謨自天降康增兩宮之神筴肆
上儀之具舉紛協氣以橫流臣等幸列通僚欣逢昌會
旅虞階之獸舞合漢殿之嵩呼資始資生既懋顯揚之
報得名得壽永儲錫羨之祥

代提舉國史進神宗哲宗徽宗皇帝國史表

三后在天軼鴻猷於今古百王冠德紀茂實於典謨爰
勒信書上千乙覽

中謝

竊以炎宋開萬年之祚裕陵發

六葉之祥丕顯哲宗於皇徽祖淵神心之相授煒聖烈
之增光載績武功疊西羌湟鄯之績稱秩元祀踵原廟
丘澤之規紛綸圖謀之符璀璨梯航之貢輯衆髦而建
學嗣養化源憲六典以訓官世嚴朝著前揖商王之躅
俯卑唐帝之蹤運啓中興統承丕緒南陽基命建武之
元號重開東觀紬書太初之后闕不錄博延碩學論次
舊聞迨繼照以龍飛甫終編於麟獲視諸故府配五聖
金匱之藏副在有司為千載石渠之鎮於斯為盛莫之

與京恭惟尊號孝通神明誠贊化育有典有則仰思祖
武之絕記動記言下協孫謀之燕播諸琬琰炳若丹青
臣職總編摩功慙潤色莫測乾坤之蘊第輸鉛槧之勤
述羲農黃帝之書既垂成式由堯舜文王之道願軫宸
衷

代中書舍人謝表

秦少游

臣某言伏奉制命除臣中書舍人仍改賜章服者蒙恩
承乏方懷曠職之憂拜命為真更竊非才之媿寵榮遽

逮驚懼交增伏以三省之興實先朝之盛典西禁之任尤當代之要津上潤色於訓詞下稽參於政理自非文章絕妙可先諸子之鳴吏術精通能最羣工之課則何以當文臣之極仕備宰相之屬官如臣者地胄素寒資才尤慙以童子雕蟲之技偶得科名用司空城旦之書常更州縣比從柱後擢立螭頭閱歲月之推移乏毫分之稱効惟虞罷斥歸耕寂寞之濱豈謂遭逢入直禁嚴之地光增末路望過初心此蓋伏遇皇帝陛下在宥中

區統和元氣上則承周太姒求賢之意下則納召康公
用士之言耆老畢歸俊英咸事鎮鄒滿庫未忘一割之
鈐刀驂駟成羣不棄十駕之駕馬遂令拔擢爰及鈍頑
臣敢不敬佩德音恪居官守竭心思之逮及效耳目之
聞知經宿進碑敢效矜誇於近世累年無草願希慎密
於前人臣無任

云

代中書舍人謝上表

左螭清近顏無咫尺之違右掖峻嚴言有綵綸之出皆

一時之妙選為四海之聳觀承命震驚撫躬愧懼伏念
臣縉紳末胄淮海孤生竊必為箕嘗奉父兄之教柄不
量鑿莫為姻黨之容自亦笑其闊迂人或憐其狂直分
甘常調望絕顯途屬二聖之載營收羣英而自助巍然
大老皆歸圖任之中叢爾小才亦備兼收之數越從戎
幕擢預憲臺猥陳狂瞽之言屢瀆高明之聽間嘗罷去
旋復召還惟是七年之間遂叨兩制之列而況訓詞之
任政教所原除授不當者得以論而封還指麾或惡者

得以白而改正號為要地當慎選掄豈伊鄙人所能堪
克茲蓋伏遇太皇太后德配任姒道稽唐虞用楫以濟
大川斷黿而立四極雖節儉正直在位若羔羊之時而
思念憂勤進賢如卷耳之際致令頑鈍誤辱寵靈臣敢
不慎出王言審求國體非特修異日祖宗之事亦以信
平生師友之謀報德未期悵念歲時之晚捐軀有處敢
懷家室之私

代賀元會表

十三月為正前既稽於夏道二千石上壽仍參用於漢
儀盛旦載逢彛章具舉 中賀 伏惟皇帝陛下財成天地

參並神明命羲和之二官謹春秋之五始調和元氣撫
御中區肆屬春王之朝肇修元會之禮雞人呼旦庭燎
有光外則虎賁羽林嚴宿衛之列內則謁者御史肅班
行之容漏未盡而車輅陳蹕既鳴而鼓鐘作應龍高舉
雲氣畢從北極上臨星宿咸拱受四海之圖籍拜萬國
之衣冠歲月日時於焉先正聲名文物粲爾可觀邁康

王鄴宮之朝揜高帝長樂之事藹頌聲而並作鬱協氣
以橫流臣比遠天光遽更年籥職拘藩國莫瞻龍袞之
升心折宸居但想獸樽之列瞻望闕庭曷勝欣抃

代宰臣以下賀日有五色雲表

秦會之

聖主當陽庶寮際千齡之運卿雲抱日清臺占五色之
祥景曜觀瞻歡均率溥竊以仰模乾象懋建國經君德
無私明有同於日照臣職匪懈勢有類於雲從惟心合
而益章則效隆而靡忒乃如今日允謂昌期如蓋如盤

方顯照臨之用非煙非霧共呈承戴之華諒非此道之
默通孰致彼蒼之昭假稽諸往牒實未前聞厯候躔離
但書於合璧慶符震育徒擬於圓車當知上瑞之難全
必待盛時而畢見是為常道匪曰私親伏惟皇帝陛下
揆道統天膺時御極體離明日而燭物霈需雲澤以懷
人輝光發衷德又新而無蔽臣鄰效力職布列而咸宜
休矣祥開厚哉貺施臣等假寵惟舊常依日月之光委
質何功偶際風雲之會誓勤繇薄永介昭明帝表常瞻

固已傾心於就望官名久正毋庸紀號於青黃

廣東提舉到任謝表

劉潛夫

臣某言伏蒙聖恩除臣為廣東提舉於某月日到任者起廢察州從天而下便私易部遵海而南具布漢條初行粵俗

中謝

臣切稽使指備載聖經君之遣臣也有光

華臣之報君也以忠信今百端之供億殆遍國中餘一髮之本根獨推嶺外方且糴舟之發銜尾齟政之取及膚空熙豐以來之儲增紹淳未有之額使賈生之及見

哀痛謂何雖劉晏之復生變通安出乃如臣者豈其任哉嘗試絃歌本宓賤言游之緒論迨分符竹慕陽城元結之遺風久間退而里居尤闊踈於時務疚心徒切着手應難惟有清修草彼筐苞之類詎宜謬巧取諸荷箸之間民生或不自聊臣死奚足塞責矧都邑之三風尤熾與閭閻之五瘡未蘇曾是人微欲其身率茲蓋伏遇陛下記功忘過舍短錄長謂一男子妄上書本緣愛主屬見大夫無可使遂取充員庶令荒遠之情悉達靖淵

之聽臣敢不褰帷而訪草奏以聞惟無瑕者裁人必先
已責以不貪而為寶少戢吏饕臣無任

云云

知袁州到任謝表

具官臣某言臣於某月日至袁州到任者臣以遭嘖言
而去國自屏空山奉明詔以典州且叨善地已臨封域
共布詔條

中謝

臣本起鰕生最為拙宦偶逢總攬遂忝

旁招猥塵公府之僚嘗奉便朝之對莫施螢爝裨日月
之清明雖批龍鱗覺雷霆之開霽惟小臣之孤立恃明

主以少安及速抨彈尚蒙涵貸支離賦粟方此養痾象
罔得珠俄而起廢惟表為郡舊名安靜之區與盜比隣
今亦孤危之地城空無備兵少且孱以妄庸繆分千里
之憂恐倉卒難待一朝之變而况別慈顏於膝下魂夢
屢驚旅隻影於天涯宦游奚樂徒有君親之一念若為
忠孝之兩全伏遇陛下奮發王威作新吏治調多壘艱
虞之際務使民安凡錄屏臨遣之人率由聖擇迺如臣
等亦在數中臣敢不厚培本根申畫封守長江之險與

我其願為強敵之防四境不治如之何此則微臣之罪

臣無任云

宰臣以下賀奉安光宗皇帝寧宗皇帝寶訓寧宗

皇帝經武要畧今上皇帝玉牒日厯會要禮成表

臣某等言恭覲奉安光宗皇帝云會要禮成者文謨

武烈並揚二后之休漢典唐經參著一王之法森寶儲

而日揭燦縟禮以星敷臣某等歡抃懽抃頓首頓首竊

以監先憲求多聞商書垂訓有常德立武事周雅紀功

迨開成標帝籍之名暨魯史謹策書之體至若觀會通
而行禮尤先撮機要以舉綱茲萃進於一時宜輯成於
五典允哲光宗之揖遜於昭寧考之儉勤燕翼貽謨焜
燿億萬年之訓攘夷復古堅凝三十載之規有嚴論述
於史筵申命纂修於宥省天啓離明之治日新賁象之
文洽媿化於登三煥鴻猷於襲六瑤編溫潤金匱閎嚴
繫日繫時裒嘉熙淳祐之記注有倫有要萃寶紹端平
之憲章討裁分飾於羣儒尊閣載差於穀旦韶鈞燧煜

羽衛歲黜絢繅采以展儀瞻冕旒而執讀事該經緯備
清覽於邇英瑞集團書肅秘藏於廣內恭惟皇帝陛下
心傳精一學懋緝熙道德風烈之庶幾邇追來孝制度
紀綱之能永勿替歷年功光祖宗政舉方策率彛章而
由舊據行事以監新文武大畧舉焉聖而繼聖禮樂庶
事備矣書匪一書臣等欽覲升明欣逢熙洽始於勤而
浹內外大施設於宏摹撰厥文而作春秋嗣鋪張於偉
蹟臣等無任 云

代謝勅書獎諭表

臣某言今日日進奏院遞到勅書一道伏蒙聖恩以臣

云特賜獎諭者捕剪兇徒蓋守臣之常職降頒溫詔

實聖世之異恩祇服寵靈重增愧懼

中謝

伏念臣稟材

綿薄受性顓愚因緣肺腑之親昧冒藩宣之寄浩穰十

邑每懷曠敗之虞黽勉再期敢起覬覦之望憶昨凶年

乏食狂盜干誅初鼠竊於村墟俄鴟張於道路殺傷吏

卒攘奪印章居民以此震驚列郡為之騷動至煩廟論

申命使車輟悍將於山東募驍兵於隴右尚且遊魂疆
場假息朝昏臣志欲掃除日思方畧忽知囊橐之處近
在掌股之間竊以為稽討蕩則荏苒而蜂屯待會合則
張皇而烏散遂令募吏潛引將兵從間道以兼行指孤
巢而突擊渠魁格鬪既就殲夷餘黨散亡尋皆殄滅臣
既不能如子賤任德使民不忍欺又不能如龔遂却兵
致盜亦皆罷仰慙睿化方虞黜責之嚴豈謂宸音遽有
旌嘉之寵此蓋伏遇皇帝陛下仁聖天覆盛德海涵欲

庶職之咸修雖微勞其必錄是致鈐刀之割亦膺衮字
之褒臣敢不效螢爝之光竭犬馬之力誓靡捐於軀命
期補報於恩私臣無任云

廣東提舉到任謝表

楊廷秀

守延陵季子之墟媿無治行使南粵尉陀之境復拜恩
言戴仁如天反已維谷中謝伏念臣學非世用才不人
先幼而讀書亦切探壁中之科斗長而試吏夫安知柱
後之惠文三年朝班再歲補郡進亦思磨礪於名誼退

則欲布宣於詔條訖無涓埃小補河嶽九天曉日念孤
臣將遠於長安四野秋風忽寵命載驅於原隰至於南
海保彼東方惟所部十有四州去修門幾四千里物衆
地大壤沃泉甘臣始入疆告厥父老上不忘遠翕然惟
呼海若祝融彈壓波瀾之險朔雲邊雪驅除江嶺之氛
暨於幽遐罔弗嘉靖臣以使事官於海邦煥乎榮光展
也徼福茲蓋伏遇皇帝陛下丕光駿命佑冒函生日月
宣精照朔南而不隔乾坤有造均雨露而無偏曾是薄

材俾將隆指臣敢不輯寧凋瘵拔去姦貪出納有司豈
但欲委積茗醴之滋殖澄清當路庶幾使豺狐狸之
一空臣無任云

知福州謝表

公道天開適際攬權之始全閩地重首叨分閫之除顯
服龍光私憂姦負中謝伏念臣孤忠自信獨立無朋先

帝輟諸玉堂之班俾司漕計陛下滌其丹書之籍旋付
藩條兩朝二紀之遭逢一節四麾之赫奕重臨郡寄僅

閱歲期米藥自將粗謹酌泉之誓繭絲是戒少寬竭澤
之嗟方生意之浸還眠初心而尤憊幸值陰霾之披豁
恍瞻麗景之昭融獲於茲辰與在親擢西廂職峻南服
任隆侯度未修豈堪牧伯之命里門在望實均父母之
邦當上下泰通之期布朝廷寬大之詔慨南部瘡痍之
未復考比年倣擾之所由政苟安恬寧有駭興之馬吏
無侵枉誰為游釜之魚雖幸勝之所傷多矣尤宿疾甫
瘳之後正貞元當養之時躬為列郡之準程大作斯民

之保障廼臣所職祇媿非材恭遇皇帝陛下健配乾行
明符晉出培千萬年立國之本一用寬仁掃數十載征
利之風大興庶恥臣欽承詔旨思體聖情志或得行詎
有禁閨淮陽之間職當自效願追潁川渤海之風臣無

任云

云

唐宋元名表卷下之二

欽定四庫全書

唐宋元名表卷下之三

明 胡松 撰

元

車駕班師賀表

李仁卿

臣某等言伏爲逆黨悉平車駕迴鑾者黃鉞耀威果凶
徒之一掃翠華旋軫遽明詔之載頒率土皆臣普天同
慶伏以周之熙朝而造管叔武庚之役漢之盛世而行

淮南濟北之誅事豈樂為兵非得已屬者逆屬相煽狂
童恣行潛包禍心構成內難惟聖人必欲去害肆天子
所以有征爰興問罪之師庸示安民之勇靈旗順指醜
類畢燔衣暫試於一戎月連飛於三捷春生秋殺立化
何私天動星迴鴻鈞自斡宗祧鞏固永孚無疆之休日
月貞明定為羣生之福此蓋皇帝陛下運膺千載道貫
九皇雄斷電馳廟謨洞徹既多算以勝少算況至仁而
伐不仁是宜氛祲廓清車書混一大統會歸於中統太

平今睹於開平凡在陶甄疇非鼓舞臣某等忝以守官
於藩翰不獲稱慶於闕庭想迎六尺之輿遙祝萬年之
壽

東昌路賀平宗表

徐世隆

聖人之兵仁而威無遠不服天下之勢離必合有險即
平方期四海之會同豈許一江之限隔捷書屢至慶頌
交馳欽惟皇帝陛下至德體元中華開統美化既東西
之被兼愛豈南北之分初遣文臣播告方國昭示包荒

之量絕無陵弱之心弗圖島夷輒拘使節誘納我叛將
盜據我歷城雖就鯨鯢之誅尚遺蜂蠆之毒蠢爾三苗
之弗率命予羣后之徂征一鼓而定荆襄再駕而降鄂
岳斬黃面縛江沔心歸鐵笕之堅城已摧金陵之王氣
何在楚地六千里不勞秦將之增兵錢塘十萬家坐見
吳王之納土偽將悉朝於闕下幼君遐竄於海中方知
恃險而亡應悔求和之晚茲雖天意實出聖籌歷觀往
古混一之難未有今日飛渡之易臣某等叨居牧寄喜

聽凱音矧魯充載筆之臣尤當述集勲之事駿奔効命
正海內一家之時虎拜揚休上天子萬年之壽

賀平宋表

孟德卿

臣巴延等言國家之業大一統海岳必明主之歸帝王
之兵出萬全蠻夷敢天威之抗始干戈之爰及迄文軌
之會同區宇一清普天均慶欽惟皇帝陛下道光五葉
統接千齡梯航日出之邦冠帶月支之國際丹崖而述
職奄瀚海以爲家獨此宋邦弗遵聲教謂江湖可以保

逆命舟楫可以敵王師連兵負固踰四十年背德食言
難一二計當聖主飛渡江南之日遣行人乞爲城下之
盟運凱奏之言還輒姦謀之復肆拘囚我信使忘乾坤
再造之恩招納我叛臣盜連海二城之地我是以有六
載襄陽之討彼居然無一介行李之來禍既出於自求
怒致聞於斯赫臣肅將禁旅恭行天誅爰從襄漢之上
流復出武昌之故渡藩屏一空於江表烽煙直接於錢
塘尚無度德量力之心乃有殺使毀書之事屬廟謨之

親稟謂根本之宜先乃命阿喇哈取道於獨松董文炳
進師於海渚臣與阿珠安達哈等忝司中間直指偽都
掎角之勢既成水陸之師並進常州一破列郡傳檄而
悉平臨安爲期諸將連營而畢會彼極窮蹙迭出哀鳴
始則爲稱姪納幣之祈次則有稱藩奉璽之請顧甘言
何益於實事率銳旅直抵其近郊招徠用事之大臣放
散思歸之衛士崛起心在四郊之橫草都無飛走計窮
一片之降幡始暨其宋國主率諸大臣已於二月初六

日望闕拜伏歸附訖所有倉廩府庫封籍待命外臣奉
揚寬大撫戢吏民九衢之市肆不移一代之繁華如故
茲惟睿算卓冠前王視萬里爲目前運天下於掌上致
令臣等獲對明時歌七德以告成深切龍庭之想上萬
年而爲壽更陳虎拜之詞

進授時歷經議表

楊武子

協時正日國政之大端章往考來歷書之明驗一或失
應衆所共瞻豈天運之靡常殆人爲之未密昔稱作者

初匪一家其始也莫不精微未幾則旋聞踈闊蓋由年
拘積算日括周分不知闕測以考真率多傳會以求合
必欲行於永久詎容失之毫釐幸當累洽之辰共仰同
文之治事加詳覈法貴變通欽惟憲天述道仁文義武
大光孝皇帝陛下政順陰陽德齊穹壤燭消息盈虛之
理得裁成輔相之宜爰命文臣若稽乾象畫則考求實
晷夜則揆度中星察氣朔之後先定躔離之朏朏精思
密索討窮源流革前人苟簡之規成盛代不刊之典其為

要旨具載成書所有授時歷經三卷立成三卷轉神注
式一十三卷歷議三卷已繕寫成二十一冊隨表上進
于冒天威不勝惶懼震越之至謹錄奏聞伏候勅音

進實錄表

王仲謀

典謨述堯舜之功令名顯著方冊布文武之政義問宣
昭粵自漢隋及夫唐宋咸有信史以貽後來況大業豐
功震令耀古惟深善述首議丕揚洪惟世祖皇帝仁孝
英明睿謀果斷爰從潛邸有志斯民植根幹而佐理皇

網聘耆德而講明治道始平大理再駕長江過化存神
有征無戰迫其龍飛灤水鼎定上都革弊政以惟新擴
同仁而一視規模宏遠朝野清明內則肇建宗祧創設
臺省修舉政令登崇俊良外則整治師徒申嚴邊將布
揚威德柔服蠻羌加以聖無不通明靡不燭守之以勤
儉朴素養之以慈惠雍和收攬權綱綜覈名實賞罰公
而不濫號令出以惟行萬彙連茹羣雄入彀削平下土
統正中邦慕義嚮風聲教實朔南之暨梯山航海職貢

無遐邇之殊方且開學校而勸農桑考制度而興禮樂
國號體乾坤之統書畫煥奎壁之文罄所有而疇戰功
不待計而救民乏聽言擇善明德緩刑歛福錫民遇灾
知懼得洪範惟皇之理過周宣修政之勤以致時和歲
豐民安吏職蓋帝德克周於廣運故至公均被以無方
可謂文致太平武定亂畧繼一祖四宗之志兼三皇五
帝之功開天立極者三十五年立經陳紀者二萬餘事
以謙讓弗遑於備紀故纂修未至於成書欽遇皇帝陞

下寅紹詒謀厲精圖治亟鑒觀於成憲思適駿於先聲
深詔下臣俾爲實錄宅心宗祏凝孝羹墻開館局而增
置官僚敎羣司而大紬圖籍編摩既富搜訪加詳采摭
於時政之編參取於起居之注張皇初藁增未見於罕
聞承奉綸音俾蠲繁而就簡俯殫管見仰體宸衷盡略
虛文一存實事其饗會征伐文物典章粲然列三代之
英蔚爾開萬世之業與夫才德孝廉之士忠良姦佞之
臣版圖生齒之繁財賦畜牧之盛謹依條據粗致無遺

今具所修成世祖皇帝實錄二百一十卷事目五十四
卷聖訓六卷凡二百七十卷謹繕寫爲二百七十帙用
黃綾夾複封全隨表上進臣等忝備台司幸膺盛典顧
惟載筆才何有於三長勉進蕪辭慮庶幾於一得冒瀆
聖聽不勝驚惶

賀聖節表

李伯宗

寶厯建元協重華之嘉運瑤光貫月開上聖之真符盛
德在秋昊天有命中賀聰明稽古孝友根心丕顯文謨

端拱巖廊之上達觀新色式均道里之中揆震風之星
辰卜豐穰於今歲璿璣肇紀玉斗儲祥臣等肅謹班聯
遥瞻粹穆宣昭鴻業載賡七月之詩考定武功願繼萬
年之雅

謝賜禮物表

吳幼清

接地風雲際會親逢於明主麗天日月照臨遠及於老
臣賜之以府庫之財衣之以筐篚之幣承恩過厚揆分
何堪俯瀝愚衷仰塵睿聽伏念臣荆陽賤士樵牧孤蹤

幼誦孔氏之遺書無繇見道長值朝家之興運有幸爲
民愧碌碌之謏才乏卓卓之奇節以言其文章則體格
卑陋以言其學行則器識凡庸自甘晦迹於深山豈覲
發身於昭代大鈞靡不覆燾小物亦預陶鎔惟成宗法
至元首貴丘園之隱歷武宗逮延祐升館閣之華先
帝擢之禁林今皇處以經幄講讀古訓對揚耿光誤蒙
上聖之簡知得厠羣賢而布列然犬馬餘齒已非少壯
之年而螻蟻微誠莫展驅馳之志外之弗能效勤勞於

郡縣內之弗能裨謨議於廟堂糜廩粟費俸錢素餐甚
矣辱高位速官謗清論凜然因負採薪之憂遂辭視草
之職雖心同葵藿常戀闕庭柰景迫桑榆宜歸田里未
嘗毫釐有補於國况又耄耄無用於時淵度涵容寵錫
優渥茲益欽遇皇帝陛下乾坤博施海宇皆春忍令散
材汨沒於泥塗欲俾寸草沾濡於雨露憫憐周恤固君
父惻隱之仁惻款控陳乃臣子辭讓之禮倘冒昧而拜
貺實踧踖以懷慙敢致懇祈乞垂矜允收此九重之大

惠全其一介之小廉壹是歡榮等如祇受臣栖遲猷猷
既難強筋力以輸忠教誨子孫誓當竭精神而報上所
賜鈔錠段足除已嚮闕謝恩外未敢欽受謹奉表辭謝
以聞

賀聖節表

鄧善之

天開景運篤有道之曾孫電繞神樞受介福於王母觚
稜瑞靄閭闔臚傳中賀誕紹鴻圖丕承駿命至仁育物
得秋而萬寶成盛德在躬居所而衆星拱當立經陳紀

之始爲施仁發政之規郊廟肇禋朝野胥樂臣等名叨
玉署目極璇霄廣文王有聲之詩載歌律呂衍殷宗無
逸之壽虔祝華嵩

賀正旦牋

瓜爾佳士常

位拱少陽仗簇黃麾之曉氣暄太簇祥開青禁之春邦
本益隆輿情胥慶中賀仰遵聖訓參贊政機執中傳精
一之心作貳敏元良之望重明繼照陰邪常遏於未形
九四在淵陽德克潛於已著茲履端之云始宜介福之

孔多某等素乏長材叨居端尹星輝海潤莫酬沾被之恩月恒日升第祝綿延之算

賀登極表

虞伯生

鴻業啓圖世守肇基之迹龍庭受賀躬膺大厯之歸欣戴云初謳歌爲盛欽以世祖紹統乾之運裕皇隆出震之名推一本之均齊累四朝之繼及於惟景命監至德之無私粵在太宗御禎符而有慶天心攸屬國勢以安欽惟陛下道合彌綸功存綏撫立長式遵於家法計宜

允協於輿情車服旌旗皆我祖宗之舊星辰河嶽赫乎
宇宙之新時開泰平人用寧一臣等叨承重任適際昌
期建皇極以敷言親揚彛訓生明堂而布政永贊成能

經筵官進職謝恩表

聖作稽古知崇效天開筵肆講於前經當宁屢煩於明
詔垂憲萬世一新經緯之文有臣十人並拜便蕃之賜
獨興睿斷創始明時伏惟昔者明王不以天縱而自聖
本之先哲式資道揆以開人故伏羲則畫於河圖神禹

錫疇於洪範凡將圖治慎在求聞蓋帝王傳授之精布
乎方冊而古今治亂之迹可以鑑觀爰諮博洽之材用
廣聰明之識然守職業者特見諸政事之著惟事啓沃
者先端其心術之微故茲曠典之行實重真儒之寄必
經業可以發聖賢之蘊必器能可以相禮樂之成必養
德之全素蒙孚信必至誠之積可致感通苟非其人不
稱茲選而臣等性本固陋學尤迂踈守其師說之遺僅
不忘其章句及傳國人之譯粗可達其性情所謂材有

限而道無窮心欲言而口不逮猶重昔人之嘆況乎臣
等之愚是故設醴上尊敷種廣厦既極詢諮於累歲茂
聞補報之微功敢謂能自得師坐而進道更錫官聯之
重俾專誦說之司雖竊思榮愈增憂責茲益伏遇皇帝
陛下以乾坤之德爲德以堯舜之心爲心無一念不在
於民生無一事不遵於祖憲遐方畢服猶虞水旱之爲
灾羣賢在朝尚恐俊良之攸伏必合二帝三王之至盛
以登四方萬國之太平下收瓊末於芻蕘俾益涓埃於

山海臣等敢不力循古訓各盡微衷非先王之法不敢
言冀必由於正路雖末世之事亦不避庶有戒於前車
尚勸九歌用稱萬壽

賀正旦牋

玉燭調元播陽春於萬物
綈衣乘翟奉景福於一人
惟
溢宮闈慶延宗社
中賀
柔嘉維則博厚無疆
帝業中興
五色鍊補天之石
女功內治七襄成報日之章
膺瓊冊
之穠華
衍金支之奕業
茂迎蒼厯
益介洪禧
某等備位

外廷稱觴前殿二南風化歌闌睢正始之音萬年室家
樂既醉太平之運

賀聖節表

春回正月律和舞羽之庭日浹芳旬瑞紀流虹之渚縉
儀洊舉治象更新

中賀

盛德在躬至仁育物紫微華蓋

煥乎經緯之爲章朱草醴泉妙與生成而合化天開壽
域人樂熙辰臣等弱翰無功清光有赫對揚休命絲綸
緝黼黻之文歌頌永年簡冊載衣裳之治

進經世大典表 歐陽原功

堯舜之道載諸典謨文武之政布在方冊道雖行於上下政無間於精粗特於紀錄之間足見彌綸之具是以秦漢有掌故之職唐宋有會要之書於以著當代之設施於以備將來之考索我國家受命龍朔繼休鴻基發政施仁行葦之忠厚世積制禮作樂關雎之風化日興紀綱具舉於朝廷統會未歸於簡牘欽惟欽天統聖至德誠功大文孝皇帝陛下總攬羣策躬親萬幾思祖宗

創業之艱難與天地同功於經緯必有鋪張以揭皦日
必有述作以藏名山爰命文臣體會要之遺意徧勅官
寺發掌故之舊章倣周禮之六官作皇朝之大典臣某
叨承旨喻俾綜纂修物有象而事有原質爲本而文爲
輔百數十年之治蹟固大畧之僅存千萬億世之宏規
在鴻儒之繼作謹繕寫皇朝經世大典八百八十卷目
錄十二卷公牘一卷纂修通議一卷裝演成帙隨表以
聞伏取進止

賀正旦表

宋 誠夫

泰元神策天開六甲之端北斗帝車星直三朝之旦立
政伊始與時皆新中賀睿知有臨明哲作則萬機初振
熙鴻號於紀年九廟載安被龍光於宗黨誕啓用材之
路式推澤物之仁臣等身際昌辰首班著位風行雷動
賡歌殊愧於古初日升月恒善頌惟先於壽考

賀親祀南郊表

謝敬德

四方于理事天致恭己之誠三年而郊卜日叶用辛之

吉功成治定禮備樂和

中賀

端拱無爲純一不二肇舉

明禋之典載嚴升配之文大呂黃鍾音協雲門之奏鎮
圭縑籍輝聯蒼壁之華祥風和氣之與游景星慶雲之
疊見穹祗集貺宗社蒙休臣等叨佐清朝欣觀熙事列
園壇之八陛幸陪漢時以侍祠陳泰階之六符願舉兕
觴而上壽

謝除憲職表

邢公濟

支郡分符已慚善政明時持節濫撫祥刑被寵以驚省

躬知愧

中謝

伏念臣資惟極陋數則多奇在昔先臣再

被裏輪之召至於晚進亦叨勸駕之行國史載隱逸之
名鄉書上經行之選實惟一門之盛事益出三朝之異
恩獨不免於窮途悵虛逢於昭代欲遂掛冠之願未酬
結綬之心豈期流落之餘偶被使令之末惟西蜀忠厚
之俗有東魯絃誦之風顧此齊民之浩穰皆自累聖之
涵養山川秀麗初無犬吠之虞囹圄空虛不待雞鳴之
教欲持平於邦憲宜精擇於司存豈容下材輒膺重任

茲蓋伏遇皇帝陛下體天地之覆載並日月之照臨刑
無用於三千囚自歸於四百欲兼容於羣聽致誤采於
虛名蓋本慮軫遠方豈獨矜誇於已推仁心以及物尚
憐穀觫之牛將德意以遣臣敢憚虺隤之馬當佩服溫
厚之典奉行寬大之書聞禮傳家粗有志於他日引經
斷獄更盡力於此時臣無任

云云

賀冊后表

楊文郁

聖德日新端齊家以身之本坤元位正備臨軒發冊之

儀慶溢九重歡騰四表

中賀

受天成命遵祖詒謀謂王

教攸基莫若人倫之重然治道之至庶資內治之勤昭
法象於軒星崇聲明於椒掖以贊嚴宸之孝理以協太
母之徽音臣等服在近司顒觀盛際道符義易占順承
載物之亨願擬堯封申富壽多男之祝

賀千秋牋

陽常居於大夏方收養毓之功震一索為長男載啓亨

嘉之會慶鍾甲觀歡溢寰區

中賀

克哲克明允文允武

春坊翊善茂隆邦本之貞曉寢問安長奉天顏之喜茲
臨彌月之節宜膺百順之祥臣等竊備詞官進趨庭賀
幸聞樂府奉重暉重潤之章請合輿情上俾熾俾昌之
壽

謝昭雪表

劉跂

投畀讒人已悟告言之妄蠲除詔令更申坐論之寃沒
而有知死且不朽竊以前世論事下敢告之章法家原
情著反坐之律未聞私書謬悠之謗可致公朝夷滅之

刑繫彼無良邁爲不令因黨友之尺牘形閭巷之有辭
引鷹揚尚父之言誦高貴鄉公之語靡慚嗤鄙惟幸詆
誣既內嫌於不根又陰虞於後患書其付火固絕意於
上聞託以屏人復何施於參驗不攻自破欲蓋而彰巧
誰謂其如簧市共知於無虎雖毀者挾怨必以惡聲而
小人乘危遂爲奇貨密騰舊札歷遺衆仇險不啻於山
川食無餘於犬彘逮從吏訊幾誤國章意所株連人以
股栗浩有漂山之勢岌如累卵之危賴先帝照矚之明

察權臣吞噬之患特紆清問少緩嚴科然而先臣諸孤
終以屏廢闔門百口益復幽囚禦瘴厲者十喪隸臣妾
者三歲無罪且至於如此大戮亦何以復加會上聖之
龍飛破羣疑而冰釋譴累所逮訴告必申悼前日之禍
機嗟何可及掛有司之罪籍名或未除用再瀝於肺肝
敢上塵於旒宸理無難者宜靡悼於改爲事已灼然遂
悉從於釐正此蓋皇帝陛下乾行以健離麗而明體大
舜聖諫之方廣有唐辨謗之畧孤忠素節事已白於九

原弱子幼孫誓各堅於一死微生何算洪造難酌

賀正旦表

姚登孫

寶厯晨開恩誕敷於朔紀瑤池春滿慶先輯於東朝日月清華神民闡懌

中賀

道符範統躬啓皇圖懿範難名

備聖人之全德仁規妙運濟天下於太寧壽並兩儀福延萬世臣等班聯文石職忝膠庠仰測卦爻喜三陽之通泰俯陳歌頌奉億載之怡愉

代謝進和御詩獎諭表

強至

參羣篇而奏御賡載非工被優詔之發中褒嘉甚渥惕
然拜君父之賜藏以爲子孫之榮伏以書曰帝庸作歌
所以極道明良之意雅云臣能歸美所以上酌福祿之
辭惟千載一時之逢踰三王二帝之際乘太平之多暇
講稀闊之盛游歷寶宇以披祖宗相受之文御飛輦以
縱神聖有餘之學以至置酒別殿賦詩中宸于時從聯
咸續睿唱如臣者有朴愚而植性無文采以表身自部
風憲之要司都廢惟言之舊學妄抽鄙思綴成斐章大

樂在前發哇聲而接響太陽臨下銜燭火以交光既續
遂旒若臨深谷敢謂兼容之度例形過獎之辭游聖門
者謂之難言矧繼堯文之後踰華袞者重夫褒字矧蒙
漢訓之加夫何孤臣叨此厚幸此蓋伏遇尊號皇帝陛
下齊德乾覆育士坤涵善雖小而弗遺力或矜其不逮
誓竭講廟之效庶酌獎勵之仁

唐宋元名表卷下之三